

AS TINGTING

Blong painim aut hamaspla mama bel insait long Madang, Papua New Guinea, i gat sik i save kamap long taim man na meri slip wantaim, olsem gonoria, klemidia na traikomona, na wanem ol samting i ken mekim ol displa mama i isi tru long kisim ol displa sik..

MIPLA WOKIM WANEM

Mipla wokim wok painim aut long mama bel klinik we mipla sekim 400pla mama bel. Mipla pulmapim pepa long stori blong ol mama na ol mama i kisim wara long rot blong karim na givim mipla long sekim sik gonoria, klemidia na traikomona. Mipla skelim ol stori blong ol mama na luksave long wanem kain ol hevi i kamap long bodi blong ol taim ol igat displa sik na tu long ol wanem ol samting i ken mekim isi tru long mama i kisim ol displa sik.

MIPLA PAINIM WANEM

Namel long ol displa mama, i gat olsem tripla mama long olgeta tenpla mama (33.7%) i gat wanpla long ol displa sik. Mak blong ol wanwan sik i olsem, klemidia em 11.1%, gonoria em 9.7% na traikomona em 21.3%. Planti long ol displa mama i gat belpen long taim ol i kam long klinik tasol mama husait i gat sampla senis i kamap long wara long rot blong karim em i gat strongpla moa sans long gat displa ol sik. Ol mama husait igat sampla senis long wara long rot blong karim, long smel, kala o sapos wara i planti tumas ol gat moa sans blong gat wanpla long ol displa sik. Tasol igat planti mama husait ino gat displa kain ol hevi, ol tu igat wanpla long ol displa sik.

Igat sampla samting mipla i painim aut olsem i ken mekim mama i isi tru long kisim ol displa sik. Ol displa samting em i olsem: Nambawan, planti mama husait i gat sik i ting olsem poroman blong ol imas igat displa sik tu, namba tu, ol displa mama yet i bin slip wantaim narapla man tu, namba tri, ol mama i stat slip wantaim man taim ol i yangpla meri yet long kain mak olsem aninit long 16pla krismas, namba fo em ol mama usat ino bin go long skul na tu ol mama usat i save stap long taun. Mipla i painim aut tu olsem, planti mama tru, kain olsem 8pla mama long olgeta 10pla (78.8%) mama ino bin usim condom long wanpla taim long laip blong ol.

OLSEM WANEM NAU

Sik gonoria, klemidia na traikomona i bikpla tru namel long ol mama bel insait long Madang distrik long Papua New Guinea. I hat tru long painim aut long ol displa sik sapos yumi nogat gutpla test long usim bikos planti long ol displa sik ino save kamap ples kilia long luksave.

Mama i ken gat sik tasol i hat long wok manmeri blong hausik long luksave. I mas i gat wanpla gutpla wei o test blong painim aut gut moa long displa sik bai yumi ken daunim hevi blong ol kain sik i save kamap long ol mama bel na ol pikinini blong ol.

Disclaimer: This abstract has been translated and adapted from the original English-language content. Translated content is provided on an "as is" basis. Translation accuracy or reliability is not guaranteed or implied. BMJ is not responsible for any errors and omissions arising from translation to the fullest extent permitted by law, BMJ shall not incur any liability, including without limitation, liability for damages, arising from the translated text.